

ARREST DE LA COVR DE PARLEMENT DONNE' LES GRAND' CHAM- bre, Tournelle & de l'Edict assem- blees le 22. Decembre 1611, en la Cause

D'entre les Prestres & Escholiers du College de
Clermont, soy disans I'ESVITES :

Et les Recteur, Doyens & Supposts de l'Vniuersi-
té de Paris.


*Auquel est inferé le SOMMAIRE du plaidoyé de Messire
LOVYS SERVIN Aduocat General du Roy.*



A PARIS,
Chez F. MOREL & P. METTAYER, Im-
primeurs ordinaires du Roy.

M. DCXVIII.

Avec privilege de sa Majesté.





EXTRAIT DES Registres de Parlement.

D V M A T I N.

Monsieur le premier President.



N T R E les Presbtres & Escholiers du College de Clairmont, eus disants I E S V I T E S, demandeurs à l'entherinement des lettres patentes du Roy du 20 d'Aoust 1610, de permission de faire leçons publiques en toutes sortes de sciences au College de Clairmont, obseruant par eus les regles de l'Edict du mois de Septembre 1603, & aultres declarations & reglements faiçts depuis, & deffendeurs d'une part: Et les Recteur, Doyens & Supposts de l'Vniuersité de Paris opposants à l'entherinement desdictes lettres, & demandeurs en requeste du 2 Decembre 1611, A ce que conformément à l'Edict de reestablissement des demandeurs, & Arrest de verification, deffenses leur soient faiçtes de faire aulcuns exercices & fonctions scholastiques, d'autre part: sans que les qualitez puissent pre iudicier.

A ij

Apres que par quatre diuers iours les Grand^e
 Chambre, Tournelle, & de l'Edict assemblees,
 Montholon pour les demandeurs; & de la Martel-
 liere pour les deffendeurs ont esté oys sur l'en-
 therinement des lettres, auxquelles les deman-
 deurs ont conclu, & les deffendeurs en leur op-
 position & requeste, le Recteur præsent pareil-
 lement oy, & aulcuns des demandeurs: Ensemble
 S E R V I N pour le Procureur General du Roy, qui
 a dict, Que le 17 de ce mois la Cause d'entre les
 Presbtres & Escholiers du College de Clairmont
 demandeurs à l'entherinement de lettres Royauls
 du 20 d'Aougt 1610, d'une part: Et les Recteur,
 Doyens des Facultez, Procureurs des nations &
 autres Supposts de l'Vniuersité opposants, & inci-
 demment demandeurs en requeste du 2 Decembre
 ayant esté appellée, au parauant les plaidoyez des
 Aduocats il remonstra à la Cour ce qu'il estime
 debuoir repræsenter au iourd'huy: A sçauoir, que
 pour le debuoir de sa charge estant obligé de pro-
 curer ce qui va à la gloire de Dieu, au bien de l'E-
 glise, seruice du Roy, assurance de sa vie, & re-
 pos de son Estat, il a exhorté les demandeurs & les
 opposants par les paroles de S. Paul, de viure en
 paix les vns avec les aultres, si cela se pouuoit faire,
 entant qu'en eus seroit. Et à ceste fin a dict aus de-
 mandeurs qu'ils se debuoiert souuenir de la grace
 qui leur auoit esté faicte par le feu Roy Henry le
 Grand, de tres-glorieuse memoire, lequel non-
 obstant plusieurs aduis qui luy estoient donnez de
 toutes parts, & par ses plus fideles & plus experi-
 mentez seruiteurs de ne les point restablir, l'au-
 roit neantmoins accordé, sur ce qu'ils luy auroient
 faict esperer de faire reüssir ce traictement favora-

ble au bien de son seruice; attendu d'ailleurs qu'ils se contentoient d'un simple reſtaſſement, ſans faire paroître qu'ils aſpiraſſent à aucune autre choſe, meſmes à ce qu'ils prétendent aujourdhuy: A quoy il auroit adiouſté qu'ils aduiſaſſent, ſ'il leur eſtoit bien ſeant de demander incontinent apres la mort de ce Grand Prince, ce qu'il auoit iugé ne leur deuoir octroyer, & que de ſon viuant ils n'ot auſé preſſer: En tout cas, ſ'ils eſtoient reſolus de perſiſter en leur nouuelle poursuite, qu'ils fiſſent ſubmiſſion de ſe conformer aus anciennes maximes de l'Vniuerſité de Paris, & Faculté de Theologie, notamment és quatre poincts qui ſ'enſuiuent.

Le premier eſt, *Que pour la ſeureté des perſonnes des Rois, leſquels nous auons veu ſouuent aſſailis, & deus fois meurtris par aſſaſſins portez à ces deteſtables attentats par vn ſauls & abominable pretexte de Religion, & par la meſchante & temeraire doctrine nouuellement aduancee, laquelle ils auoient appris dans les livres & és Eſcholes d'icculs demandeurs (ainſi qu'il eſt apparu par les declarations des coupables & Arreſts de la Cour) iceuls demandeurs renunceront à ces opinions damnables, & non ſeulement deſaduoueront ceuls de leur Societé qui les ont enſeignees, mais eſcriront contre icelles ſuiuant la parole de Dieu couchée en l'Ancien & Nouveau Teſtament: Enſeigneront, diront en tous lieux & eſcriront, Que nul, ſoit eſtranger ou naturel ſubieſt d'un Roy, ne doit attenter aus perſones & vies des Rois & Souuerains, ſoubs le tiltre d'autorité quelconque, ſpirituelle ou temporelle, pour quelque ſubieſt & cauſe que ce ſoit, meſme pour cauſe de leurs mœurs ou religion: Promettront & proteſteront par eſcript de declarer ceuls qui ont eu, ou auroient ces execrables deſſeings, ſi ils ſont venus, ou viennent à leur cognoiſſance; & de ne ſuiure iamais les opinions ſur leſquelles les*

6

esprits forcenez se pourroient directement ou indirectement appuyer pour bastir la resolution de tels attentats sur les personnes sacrees des Oincts de DIEU.

Le second poinct, Que pour le bien de l'Estat, les demandeurs en lettres recognoistront, diront, enseigneront, & escriront, Qu'entre les puissances souveraines ordonnees de Dieu, le Roy tres-Chrestien des François ne recognoist aultre superieur es choses temporeles que Dieu seul, par la grace duquel il ha l'entiere domination sur ses subiects: & qu'il n'est non plus loisible aus puissances spirituelles sous couleur de pieté, & de promouvoir, ou defendre la religion, d'empieter sur le temporel des Rois & Princes Chrestiens, qu'aus puissances temporeles d'entreprendre sur les spirituelles, sous vmbre d'autorité Royale. Et partant que les demandeurs n'enseigneront iamais sur ce subiect les distinctions n'aguères inuentées par quelques Docteurs, & conceues en ces termes, directè, aut indirectè, per se, aut per accidens: Ains recognoistront que ces subtilitez d'Eschole changent seulement les termes, & non la chose, afin d'establiir en l'Eglise vn pouuoir absolu à la destruction de tous les Estats seculiers, & transformer le pouuoir spirituel en temporel, en attribuant à la dignité Sacerdotale vne Domination Temporele à la façõ du droit & gouvernement d'un Roy. Et au contraire ils soustien- dront par maxime certaine & non problematique, Qu'aucune puissance ny authorité ne peut deposer, suspendre ny priver le Roy de son Royaume, soit pour s'en saisir, ou pour l'exposer en proye,

Le troisième poinct, Que les demandeurs pareillement enseigneront, diront & escriront, Que tous les subiects du Roy tant Ecclesiastiques que seculiers luy doibuent l'obeissance telle que Nostre Seigneur Iesus Christ estant faict homme l'a rendue aus Empereurs & Magistrats naissant & mourant, & ainsi qu'il l'a ordonné par ce comman-

dement, Rendez à Cæsar ce qui est à Cæsar, & à Dieu ce qui est à Dieu, aiant conformément à cela déclaré que son Roiaume n'estoit point de ce monde, & que s'il en eust esté ses gens eussent combattu pour luy. Et que ces paroles, comme aussi celles de S. Paul aux Romains c. 13, Que toute ame soit subiecte aus puilsâces supérieures qui sont en estat, ne cōtiennent pas vn précepte, déclaration, ny exemple seulement pour vn temps, auquel les forces temporeles manquoient aux Chrestiens (ainsi que l'un des principauls de la Société des demandeurs l'a escript) Ains obligent vniuersellement & pour tousiours toutes personnes Ecclesiastiques & Laiques: Et partant iceuls demandeurs soustiendront qu'il fault suivre ceste regle tenue par les Apostres, & par les vrais Chrestiens leurs imitateurs, lesquels tant lors qu'ils estoient en petit nombre, qu'après qu'ils ont esté multipliez, ont obey aus Empereurs & Rois és choses temporeles, mesmes aus Infideles & Haretiques persecuteurs. Et en consequence iceuls demandeurs en lettres promettront & asseureront d'enseigner, dire & escrire, Que nulle puissance quelle qu'elle soit, non pas mesmement l'Eglise assemblee en Concile, ny autrement, n'ha droict de dispenser, ny d'absouldre les subiects du Roy du serment de fidelité & obeissance qu'ils luy doibuent par toute sorte de droict diuin, naturel & humain.

P O U R le quatriéme poinct concernant la police Ecclesiastique, Que pour la conseruation de l'authorité Royale, & manutention des lois de l'Estat, iceuls demandeurs en lettres maintiendront par parole & par escript les droicts & libertez de l'Eglise Gallicane, dans laquelle ils font estat de viure; sans dire, escrire, ny proposer au contraire aucune chose soubz vmbre de quelques Decrets, lesquels n'ont esté approuuez ny receus en France: Et que dès à present ils promettront d'escrire, & feront

approuuer par leur General & Prouinciauls ce qu'ils es-
criront contre ceuls de leur société, lesquels ont publié des
maximes repugnantes à ces quatre poincts. Et generalemēt
qu'ils suivront en tout & par tout les anciens Decrets &
doctrine de l'Vniuersité & Faculté de Théologie de Paris.
Et iusques à ce qu'ils y aient entierement satisfait &
donné assurance par preuues certaines d'une sincere &
veritable intention, qu'ils se tiendront dans les termes de
leur reſtaſſement, ſauf apres à leur faire droit ſur ce
qu'ils requierent de nouveau, ſelon qu'il ſera aduiſé par la
Cour.

C'eſt ce que luy qui parle a dict ſouuentefois à
quelques vns de la compagnie des demandeurs, &
que pluſieurs perſonages de qualité eminente Cō-
ſeillers du Roy en ceſte Cour, & autres ont enten-
du s'eſtants rencontrez ſur ces propos: & encores
il l'auroit dit au Pere Fronto, & à vn aultre de ſes
freres le iour præcedent la premiere audience,
en la præſence d'un Officier ſigné en pieté, do-
ctrine, fidelité & affection à l'Egliſe, à la perſone
du Roy & à l'Eſtat, Præſident en vne compagnie
ſouueraine, lequel ayda à les exciter de faire fran-
chement & ingenuement la ſubmiſſion qui leur
eſtoit propoſée, & ſoubſcrire aus poincts que la
Cour a oy: bref declarer qu'ils les approuuent
ſans æquiocation ny euafion.

Sur quoy comme luy Aduocat du Roy deman-
doit vne reſponſe certaine, le Pere Fronto auroit
reparty, que quand luy & quelques autres de ſa ſo-
cieté, qui ſont à Paris, auroient le ſentiment tel que
l'on requeroit d'euls, (dont il diſoit quant à luy ne s'eſ-
loigner pas, eſtimant que pour choſes concernant la police
il ſe falloir accommoder au temps & aus lieux où l'on auoit
à viure) toutesfois il n'en pouoit faire vne decla-
ration

ration précise & formelle, sans auparavant, en auoir parlé à ceuls de sa Compagnie estants en ceste ville: & qu'encores il croyoit qu'après qu'il leur en auoit communiqué ils ne pourroient pas respondre promptement ny resolutement à ces propositions, sans en demander & auoir l'aduis de leur General, duquel il faudroit attendre la volonté.

Ce qu'ayant représenté au Recteur & à ceuls qui l'assistent, ils auroient dict ne pouuoir approuuer les paroles de Fronto, subiectes à æquiuoque, mesmes sur ce qu'il auoit dit *qu'en faict de police on se pouuoit accommoder au temps & aus lieux où l'on auoit à viure*: & qu'estant certain & notoire que la Societé des demandeurs en lettres dependoit en tout & par tout de leur General, qui est hors de France, avec pouuoir plus absolu que les aultres Generauls n'ont sur leurs Religieus, il n'y auoit pas moyen de se pouuoir asseurer sur ce qui viendrait de ceste part: veu mesmes que les Iesuites vouloient donner la loy à tous les autres Ordres, & ne la receuoient d'aucun. Et d'auantage, que les demandeurs auoient baillé occasion de se deffier d'eux par leurs deportements en tous les pays où ils ont pris pied, ayants voulu s'y rendre maistres, tant des Clercs que des Laiques; joint que pour toute regle ils ont le seul but de leur vtilité & aggrandissement de leur Compagnie à la diminution des autres: & aussi qu'ils tiennent des maximes contraires aus anciennes lois & droicts du Roy & du Royaume; & quand quelqu'un de leur Societé a faict vn mauuais escript, ny la compagnie en general, ny aucun d'icelle ne le desaduouë iamais en public, & ne veult escrire pour la verité. Plus le Recteur a dict particulièrement qu'il auoit plusieurs moyens à

déduire contre la prétention des demandeurs, lesquels il représenteroit à la Cour tant par son Advocat, que par sa bouche. Ce que luy qui parle pour le Roy auroit creu debvoir dire en ce lieu, pour sa descharge envers Dieu & les hommes, & à fin d'esteindre toute discorde qui pourroit apporter quelque scandale & diuision en l'Eglise & en l'Estat. Et sur ce il a supplié & supplie encores la Cour recepuoir ceste proposition en bonne part, comme elle doit estre prise & interpretée sainement par toutes personnes espurées de mauuaises affections, & qui ne voudront pas faire de la religion vne faction. Declarant que si par dessus ces ouuertures la contention s'eschauffe, il diroit ce qui est à desirer, & en quoy il y a du mal & manquement de tous costez selon que la saison & la raison requierent la censure.

OR puisque les parties ont contesté par trois diuers iours il rapporte ce qu'il a obserué es pieces & escripts d'iceuls Presbtres & Escholiers du College de Clairmont, soy disants Iesuites demandeurs, dont il a fait le recueil, oultre les lieux citez par Montholō, & par la Marteliere, tant pour ce qui est de l'institut des demandeurs en lettres, que de leur procedé, & doctrines, qui sont les trois poincts par lesquels il fault examiner s'ils sont propres à enseigner la ieunesse, & si leur instruction peut estre bonne & vtile.

Et premierement pour ce qui regarde leur institut de Clercs soy disants reguliers & Religieus, on void qu'il est plus fondé en priuilege qu'en regle. Et à ceste fin il a remarqué le but, la vie, & conduite d'Ignace Loyola leur fondateur escripte par Ribadencyra & Maphée, & cotté leurs Constitu-

tions & declarations d'icelles imprimées à Rome, les Bulles qu'ils ont eu des Papes en nombre de trente sept, les priuileges nouveaux, & exemptions aussi impetrées à diuerses fois, comme ils parlent *viua vocis oraculo*, les Canons de leurs Congregations generales, & les Epistres de leurs Generauls.

Et pour ce qui concerne leur procedé & deportements, a dict ce qu'il a veu par actes de ce qui est arriué depuis l'entrée & establisement des demandeurs en France, lors qu'ils se sont præsentez; à sçauoir le Iugement que feit d'eus Messire Eustache Du Bellay Euesque de Paris le 3. d'Aougt 1554, suiuy de la Declaration & Conclusion de la Faculté de Theologie assemblee au College de Sorbonne en la mesme annee: & ce qui s'est passé depuis à Poissy, où ils dissimuloient leur Institut; & ce qu'ils ont faict apres, mesme leurs offres d'enseigner *gratis*, & les Responses de l'Vniuersité, & de Turnebus. Item les *Plaidoyez de l'an 1564, & notamment celui de M. Baptiste du Mesnil Aduocat General du Roy, & l'Arrest d'Appoincté au Conseil*. Item a dict ce qui s'est passé en Italie, Hespagne, Pologne, Moscouie, Angleterre, & en l'Estat de la Seigneurie de Venise touchant ceste Societé. Plus a rapporté ce qu'ont faict ceuls de ceste Compagnie en l'an 1577, & leurs deportements conformes au pouuoir déclaré au DIRECTOIRE DE L'INQUISITION imprimé à Rome l'an 1585, dont il a noté les lieux: d'où l'on tire vn argument qu'ils sont Inquisiteurs secrets. Item a remarqué ce qui s'est passé au Conseil du Roy & en la Cour, auparauant & lors de la procedure faicte contre Iehan Chastel parricide, qui estoit leur disciple: & ce que contiennent leurs Annales secretes des annees 1594 & 95, dont il tient

en main vn exemplaire entier imprimé à Naples l'an 1604. Plus luy Aduocat du Roy a remarqué leurs entreprises par les extraicts de plusieurs Breuets obtenus (qui est à peser) depuis leur reſtabliſſement, & contre les termes d'iceluy. Plus a faiſt recit des Remonſtrances faiſtes au Roy par Monsieur le Premier Præſident de Harlay, des actions duquel la vertu meſmes peut apprendre vertu. Item les Reſponſes faiſtes par ce Grand Roy Henry, Prince Treſ-clement, comme Treſ-victorieus & Iudicieux, portants la declaration de ſa volenté, ſur le ſeruice qu'il eſperoit des demandeurs en lettres. Plus ce que l'on a remarqué des actes par eus depuis faiſts que l'on prætend contraires à ce qu'ils auoient promis à ce bon Roy, & leurs Reſponſes ſur ce. Bref autres actes qui monſtrent ce qu'ils ont faiſt de temps en temps pour ſ'accroître & acquérir credit, ſe fourrants dans les maiſons, pour ſçauoir les ſecrets, & en tirer des biens, & ſ'ingerants en toutes affaires ſoubz vmbre du maniement des conſciences: comme Iosephe rapporte au 13 libure de l'Histoire Iudaïque c. 23, & 24 que feirent les Pharisiens en Iudæe au temps d'Hircanus & d'Aristobulus enfans du Roy Alexandre, ſoubz la Regence de la Reyne Alexandra leur mere.

Et quant à ce qui touche leurs doctrines a noté ce qu'il a veu dans les œuvres de *Bellarmin*, ſur tout au *Traicté De potestate Pontificis in Temporalibus*, & de *Gregoire de Valentia*, *Vasquez*, *Turrian*, *Tolet*, *Suarez*, *Molina*, *Ribadeneyra* au libure intitulé *Princeps Christianus*, *Keller*, *Andraas Eudamon Ioannes*, *Ioseph Cresuel Anglois*, ſoubz le nom de *Philopater*, *Leonardus Lessius*, *S. Heissius*, *I. Gretzerus*, *I. Azor*, & *Mariana*. Item de *l'Amphitheatre d'honneur*, imprimé l'an 1606

sous le nom de Clarus Bonarscius, duquel le vray nom est Carolus Scribanus cy-deuant Recteur du College d'Anuers, dont luy qui parle auroit donné aduis au feu Roy Henry le Grand, à ce qu'il pourueust à la conseruation de sa vie exposée aux assassins & parricides par cest Escriuain es endroicts dont il a faict lecture, ainsi qu'il l'auoit fait à iceluy Seigneur Roy en præsence d'un Seigneur de qualité, lequel a l'honneur d'appartenir au Roy, & d'un fidel & ancien seruiteur d'iceluy Seigneur Roy, præsente aussi le Pere Cotton, qui dict lors que ce libure de l'Amphitheatre n'estoit pas d'un de sa Compagnie, ains faict à Geneue par les Heretiques pour rendre les Iesuites odieux, & depuis neantmoins a tenu langage contraire, louant cest escript de Scribanus, & en dōnant des exemplaires à plusieurs, & entre autres à un personnage d'honneur, vray Catholique & bon François, luy disant que le style de cest Auteur estoit excellent, & propre à l'instruction d'un enfant pour le faire bien parler Latin, encor que les paroles de ce libure soient semblables à celles dont a usé le dernier assassin, lors qu'il a esté interrogé sur le detestable parricide par luy commis en la persone du feu Roy. Ce que luy Aduocat du Roy ne peut reciter sans trembler, en parlant d'un si abominable escript, lequel a esté mis au Catalogue imprimé à Anuers l'an 1608 des libures composez par les Iesuites, comme d'un Auteur approuué par la Compagnie.

Plus a iceluy Aduocat du Roy faict recit des Aphorismes d'Emanuel Sa, & autres Casuistes qui destruisent toute la Morale & Politique Chrestienne. Item des Axiomes de Jehan de las Salas, & des libures de Sanchez, dont les extraicts ont couru, ayants esté

imprimez au lieu qu'il les falloit supprimer, pour les horribles & vilains propos qu'ils contiennent. D'avantage a fait rapport de l'*Apologie de Richeome*, & aultres libures qu'iceluy Richeome, Cotton, & semblables de leur Societé ont mis en avant pour leur defense, mesmes du libure intitulé *La Verité defendue pour la Religion Catholique en la cause des Iesuites, contre le plaidoyé d'Antoine Arnaud imprimé soubz le nom de François des Montagnes, à Liege en l'an 1596, & des diverses Responses au libelle intitulé Anticoton, & Lettre Declaratoire d'iceluy Cotton adressee à la Reyne Regente, incontinēt apres la mort du feu Roy*, qui ont esté employees par Montholon pour repliques au plaidoyé de la Marteliere: En aulcuns desquels libures encores qu'ils soient couchez en termes qui ont quelque apparence de pieté & de raison: Toutesfois la verité opposee à la couleur efface leur dire: & ce que l'õ a allegué pour les iustifier les charge d'avantage, les rendant coupables des mesmes fautes que ceuls qu'ils defendent: si c'est assez d'appeller fautes les propositions qu'ils font & soustienēt de plusieurs maximes nouvelles & estrāges, tāt en la Morale qu'en l'Oeconomique, & Politique Ecclesiastique, & Tēporele: faisants par ce moyen cognoistre qu'ils tendent à la destrucțiō des puissances ordonnees de Dieu, renuersement de toute la Iustice, mesmement de la Hierarchie soubz cœleste de l'Eglise Catholique Apostolique Romaine, & des Ordres de Religieus & Clercs reguliers antiens, contre lesquels iceuls Iesuites ont en diuers temps fait diverses entreprises: comme aussi à la diminution des Vniuersitez, prenans licence de faire des Docteurs selon leur bon plaisir sans examen public. Plus luy qui parle a supplié la Cour d'entendre la lecture du libure intitulé *Manuale sodalitatis*, imprimé au Pont-

a-Mousson l'an 1608, en l'endroit qu'il a marqué & mis és mains du Recteur pour le lire, afin que l'on cognoisse comme ils enseignent la ieunesse de se pariurer quand elle est deuant les Magistrats. D'abundant apres la lecture faicte par le Recteur des lieux cotez en ce Manuel, a faict recit de plusieurs poincts, tant censurez par la faculté de Theologie, qu'autres qui sont contenus és *trois predications faites en langage Hespagnol és années 1609, & 10, sur la beatification d'Ignace, fundateur de ceste compagnie dictée de I E S V S, traduites en François par François Sollier Religieus d'icelle, & du libelle où il les a soustenu avec blasphememes contre Dieu, & iniures contre les Theologiens qui l'ont repris.*

Quant à l'Vniuersité, il a remonstré qu'il y a à redire en quelques Docteurs & Regents, lesquels font ce qu'ils ne doibuent pas, & ne font pas ce qu'ils doibuent. Que si leur negligence ou aultre contrauention aus statuts & reglemens verifiez en la Cour a donné subiect de plainte, comme de verité il y en a: il plaira à la Cour y pouruoir, ainsi qu'il est besoing: cela se pouuant faire en employant d'autres persones que les demandeurs en lettres: Contre lesquels on peut dire par les termes des Constitutions de S. Basile & aultres saint Peres touchant les exercices des Religieus reguliers, que iceux demandeurs entreprenent chose qui n'est pas seante, & ne peult estre profitable à leur profession, non plus qu'au public: n'estans fundez ny en raison, ny en bon exemple, ny en la saine doctrine tenuë par l'Eschole de Paris, soit pour la Theologie, que l'on appelle Scholastique, soit pour la Positiue, Morale & Politique, *mesmement pour les quatre poincts à eus proposez: ny aussi pour la litterature, pour laquelle ils ne peuuent fournir que peu*

d'hommes suffisants.

Pour ces raisons concludant, comme il doit conclurre pour le Roy, tant pour la seurété de sa personne, que pour le bien de l'Eglise & de l'Estat, & tranquillité publique, & pour l'honneur & manutention des lettres & sciences, Declare qu'il adhære à l'opposition de l'Vniuersité, & où la Cour appoincteroit la cause au Conseil pour voir & examiner les libures & escripts dõt elle a entendu le recit, & lesquels luy Aduocat du Roy ha en ses mains portant la preuue de son dire, il requiert defences estre faictes aus demendeurs en lettres de faire leçons publiques, ny aulcun aultre exercice, ny fonction Scholastique, pour l'instruction des enfans, ny d'aultres en ceste ville de Paris, jusques à ce qu'aultrement en soit ordonné par la Cour, soubz telle pœne qu'elle aduîsera.

La Cour sur l'entherinement des lettres appointe les parties au Conseil, corrigeront leurs plaidoyez, y adionsteront tout ce qui leur semblera dans huitaine, produiront, bailleront cõtredictz & saluations dans le temps de l'Ordonnance; & à oir droict: Ordonne que le Prouincial & ceuls de la compagnie des demandeurs qui l'assistent à l'audience, soubzscriront presentement la submission faite par leur Prouincial de se conformer à la doctrine de l'Eschole de Sorbone, mesmes en ce qui concerne la conservation des persones sacrees des Rois, manutention de leur autorité Royale, & libertez de l'Eglise Gallicane de tout temps & ancienneté gardees & obseruees en ce Royaume; Pour le tout veu & communiqué au Procureur General du Roy, & ioinct à l'appointé au Conseil, faire droict aus parties ainsi que de raison. Cependant a fait & fait inhibitions & defenses aus demandeurs de rien innouer, faire & entreprendre contre & au preiudice des lettres de leur reſtabliſſement, & de l'Arrest de verification d'icelles, s'entremettre par eus, ou persones interposées, de l'instruction de la Ieunesse en ceste ville de Paris, en quelque façon que ce soit, & d'y faire aulcun exercice & fonction de Scholarité, à pœne de descheance du reſtabliſſement qui leur a esté accordé, despens reservez. Fait en Parlement le 22 Decembre 1611.

Signé.

DV TILLET.

